

Xueves, 3 de xunetu del 2025

La Joven Orquesta Nacional de España (JONDE) empieza en Xixón la so xira europea col director de la OSPA, Nuno Coelho, al frente

- La música d'Igor Stravinsky, Isaac Albéniz y Fabià Santcovsky, compositor ganador del Premiu Reina Sofía de Composición Musical 2023, va sonar nel Teatru de la Llaboral col violinista Francisco Fullana como solista
- El conxuntu cultural autonómicu va acoyer del 17 al 25 de xunetu l'alcuentru anual de la JONDE, qu'axunta a 102 músicos menores de 27 años

El director xeneral d'Acción Cultural y Normalización Llingüística, Antón García, presentó esta mañana'l conciertu que la Joven Orquesta Nacional d'España (JONDE) va ufiertar el 26 de xunetu a les 20 hores nel Teatru de La Llaboral de Xixón, un equipamientu xestionáu pola Consejería de Cultura, Política Llingüística y Deporte. Na presentación tamién participó la directora artística de la JONDE, Ana Comesaña.

Amás, el director de la Orquesta Sinfónica del Principáu d'Asturies (OSPA), Nuno Coelho va dirixir la Joven Orquesta Nacional d'España (JONDE), unidá dependiente del INAEM, qu'empieza la so xira europea con un conciertu'l 26 de xunetu, a les 20 hores, nel Teatru de La Llaboral de Xixón.

El programa que se va interpretar en La Llaboral va poner el focu na creación española col *Concierto de los Elementos: I & II*, obra ganadora del Premiu Reina Sofía de Composición Musical 2023, del compositor catalán Fabià Santcovsky. El violinista Francisco Fullana va encarar esta obra como solista poniendo de manifiestu la so capacidá interpretativa tan ecléctica. A esta creación actual van siguila dos obres referentes del sieglu XX: *la Suite Iberia*, con orquestación de Francisco Guerrero, d'Isaac Albéniz y *La consagración de la primavera* d'Igor Stravinsky.

Amás, la JONDE, que'l so oxetivu ye formar al nivel más altu a músicos mozos na etapa previa al desenvolvimientu de la so actividá, va celebrar en Llaboral Ciudá de la Cultura'l so segundu alcuentru anual. Del 17 al 25 de xunetu, 102 músicos de la JONDE d'ente 18 y 27 años van preparar el programa gracies a la formación de 12 docentes de diferentes especialidaes integrantes d'agrupaciones sinfóniques y centros académicos de prestixu nacional y internacional.

Nota de prensa

Pal conciertu de la JONDE nel Teatru de La Llaboral, les entraes yá tán disponibles a un preciu de 6 euros na recepción del equipamientu cultural, nel Centru d'Información Turística del Principáu d'Asturies n'Uviéu y na web laboralciudaddelacultura.com.

Nuno Coelho

Nuno Coelho ye'l director musical de la Orquesta Sinfónica del Principáu d'Asturies (OSPA) y va ser l'encargáu de dirixir a la JONDE na so próxima xira de conciertos de branu, qu'amás de la so cita na villa xixonesa va tener una presencia destacada en festivales europeos importantes: el Festival Grec (Barcelona), el Rheingau Musik Festival (Wiesbaden) y el Young Euru Classic Festival (Berlín).